

13. april 2016

UPA 2016/113

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaata allanngortinneqarnissaanik Ilinniartitaanermut Naalakkersuisumit Inatsisartut inatsisissaattut saqqummiussaannut ima Siumumiit oqaaseqassaagut.

Siumumiit nuannaarutigaarput Ilinniartitaanermut Naalakkersuisup inatsimmik eqaallisaniarluni qulequtaq pingaaruteqarluinnartoq saqqummiummagu.

Ilinniarsimassutsikkut nunap imminut nappassinnaanera qaffasinnerpaaffissamiitsikkumallugu sutigut tamatigut eqaatsumik ataqatigiissumillu minnerunngitsumillu nunatsinnut tulluursakkanik atugassaqartitsinissaq aqputtissiuinissarlu pingaaruteqaaq.

Naalakkersusut nunatsinni inuussutissarsiutitigut qitiusumillu ilinniarfiit tigusinnaasaat ilinniartissutigisinnaasaallu atorluarneqarnerusariaqarnerannik oqariartuuteqarnerat tigullu arparput, soorlu aamma ilinniartoqarfiit namminneq taamak ujartuisimasut.

Qulequtarli pineqartoq inatsisinik allannguinerinnakkut ilorraap tungaanut saatsinneqarsinnaasoq qularaarput, inuiaqatigiinni allannguneq pissappat aamma pissutsit piviusut ammasumik oqallisigisinnaasariaqarpavut. Soorlu qanittukkut qulequtaq mannarpiaq, nuna tamakkerlugu isiginnaarutikkut oqallititsilluni aallakaatinneqartumi sammineqarnerani, sulisitsisuniit oqariartuutit ilagigaat ilinnialersartorpassuit ajoraluartumik uniinnartarnerannut pissutaataasoq ilinniartut qallunaatut tuluttullu ilaatigut pikkorluppallaartarnerat.

Taamak oqariartuuteqarneq tamakkiisumik oqaluuserineqassappat, aamma mumillugu oqalligineqartariaqartoq isumaqarpugut. Nunatsinnimi sulisitsisorpassuit, minnerunngitsumik saanartornerup iluani, oqaatsitsinnik atuisinnaassusaat annikippallaarujussuarpoq. Naluneqanngitsutullu paaseqatigiissinnaaneq sumiluunniit suliffeqarfimmi piunngippat, tamanna soorunami ilinniartut amerlanerusut uniinnartarneranik aammattaaq kinguneqartarpoq.

Taamaammatt nassuerutigisariaqarparput tamatta ajornartorsiutigatsigu sulitsisut amerlavallaartut Nunatta oqaasiinik pisortarigoortunik inorsartunik piginnaasaqarnerat. Nassuerutigisariaqarparputtaaq tamakkuummata aamma inuppassuit anniaatigisaat, aamma maani oqaluttarfimmi oqaasinngortissinnaasariaqakkavut. Oqaatsit paaseqatigiinnermut aqputaapput illuatungaannaali piumaffigineqarpat paaseqatiginnikkusussuseq taava sumiippa?

Sungiusarfissaaleqisarnerup ilaatigut atuarfimmi sulilluni ingerlanneqarsinnaanerata annertu-
nerusumik aqqutissiuunneqarniarnera ilassilluarparput, soorlu aamma ilinniarnermi sammi-
viit nunatsinni neqeroorutaanngitsut neqeroorutaasinnaalernissaannut inatsisinik tunngaviu-
sussanik erseqqissaasoqarnissaa ineriartoqqiffissanik ammaassinertut tikilluaqqugivut.

Inuussutissarsiornikkut ilinniartitaaneq tamatta siuarsaaqataaffigisariaqarparput, taamaam-
mallu nunatsinnut aqqissuussineq tulluarnepaamik inuusuttunullu amerlanerpaanut iluaqu-
taasumik aqqutissiuuttuartaqarparput. Suliami tamatumani Siumumiit peqataanissatsinnut
qilanaarpugut.

Taamak oqaaseqarlunga Inatsisissatut siunnersuut ataatsimiitsitaliamut susassaqartumut
ingerlatinneqarnissaa innersuussutigaarput.

Vivian Motzfeldt
Siumut